

中國邊境史料通編

(秦—清)



中國邊境史料通編

(秦—清)

二二

洋防輯要卷十七

漱浦嚴如煜樂園軒

策畧

安康張鵬飛補山梓

唐樞云凡商於海者武具而力齊雖有小寇無所容於其間市通則寇轉而爲商市禁則商轉而爲寇

漁戶竈丁但當用小船不當容其打造大船通番引寇

戚繼光曰選兵之法第一不可用城市油滑之人面目光白行動伶便者是也又不可用奸巧之人神色不定見官府藐然無忌者是也最可用者鄉野老實黑大粗壯手肉堅厚有土作之色選兵以膽氣爲主人肥大而膽不充則脂重不能疾趨反爲肉累藝精而膽不充則手足倉卒反至失戈先衆而走伶俐而膽不充則未陣先思自全臨事必然先奔反以利害恐人爲已避罪之地力大而膽不充則臨時眼花足軟呼之不聞推之不動諺曰藝高人膽大言高藝可添於

有膽之人非謂懦弱之未熟一藝而即可膽大也但此輩不可多得其次則武藝尚可教習必精神力貌兼收人之精神露於外選人以精神爲主而參用相法忌凶死之形重福氣之相鄉野愚鈍之人畏官府畏法度不測我顛倒之術誠信易於感孚愾氣易於振作先壓以異常之威使就我彀中而卽繼之以重恩收其心結之以至誠作其氣則爲我月命無疑井伶俐油滑者可比也

胡世寧曰練壯丁之法每戶今各置堅利器械二件請教師晝夜演習槍杷要長短大小不齊弓弩各隨氣力強弱人長者學弓學槍人短者學把學牌而學槍學銃兼使學棍學弓弩牌者兼使學刀軍民中有膽力過人武藝精熟者許報名另立義勇名色重加優待臨用之時與官軍同給糧賞有功卽爲超拔

唐順之曰攻捕之法不在增兵而在練兵兵果練得精銳士爭抵掌

人賈餘勇遇賊必不退懾屹然足爲倚重

茅鹿門曰南人不習射當如兩河以北懸射銀錢之利以誘之弓師弩師能教百人善得兼二人之食卽爲百夫之將不數月全軍善射矣鄉長約束甲長聞驚舉砲爲號各甲赴援有不聽約者許其綁縛而告之官按軍法治之

體賄將官乃任將第一義將官不能成功正以貧者無德以服衆廉者無力以設施若能恤其利則貧者可以無貪而廉者可以成功矣仇俊卿曰有良將無弱兵

張椿曰爲將須有膽有畧有量有德殺人如刈苗草從善如轉圜用財如揮沙保民如恤子拘泥故常不足有爲也

胡梅林曰將不同有大將有偏將偏將不同有先鋒有哨援有守營有奇伏大將必善將將者也偏將亦須恤下而不苟遇敵而不懼奉

令而不違沉機而不露應變而不窮古人所謂善將兵者也

茅鹿門曰吳越之間鉅家勢族不惜千金爲子弟鬻官若令自募之兵能奮勇動賊斬首級者倍官兵之賞奏予官職則不獨思保其妻子田廬之有且競得夫爵賞寵祿之及其氣百倍矣使船必用造船之人則不吝工料而且知憐惜領兵必用練兵之將則用心訓練而相識認凡練兵者不但練其藝必先練其心

戚繼光曰練兵者不可但學空套必將臨陣的真法真令真藝真學習庶操一日有一日之效熟一件有一件之利又曰善操兵者必使其氣性活潑心志兢業或逸而沉之或勞而息之或相其意態察其動靜而樽節之

毛希秉曰軍之克敵者在器兵不完利與空手同射不中的與無矢同勝奇兵者必以正勝短兵者必以長明部分正約束遠斥候行如

戰戰如守是爲正兵強弓勁弩射疎及遠是爲長兵凡辦賊以殄滅爲期不可犯危險而取必旦夕所謂致人而不致於人也

仇俊卿曰兵須有選鋒冗兵之費徒勞膏脂

保甲之法止可安新附之民禦鼠竊之賊諺曰省錢易飽吃了還饑真正殺賊總須練得精兵方可取勝也

團練鄉兵不過共保室家小警則虛張聲勢以幸賊之不來大警則預行收歛以免禍之太慘若欲力穡之民盡爲荷戈之衆誠恐操練不素則爲不教之民揀閱以時又有妨農之患聽其自食則人弗樂從給之官帑則所費滋多勢旣難行事多虛衍耳

策畧云調客兵不如練土兵調兵一而當練兵者其費百當土著之兵者其費十

王守仁曰沿途該用廩給口糧等項合令計算總支庶免阻滯

楊溥云今日之事不難於禦寇而難於馭兵不難於足兵而難於足食投募之兵多有游民參雜其間官司未得其用地方反受其害

唐順之云軍制不足權行召募未爲經久之計梟猾之徒方應募於江北忽應募於浙東方以得募價而留忽以滿募期而去譬如借債之人主人不得而羈安得而練之總之以練壯兵爲實事以募兵爲權宜以調兵爲寄道募兵則遠募不如近募調兵則多調不如少調募兵之法當於本處報選何也其家在是則新獲工食便於歸寄若四方泛募則是烏合之衆無賴之徒招之甚易散之甚易今日之兵又卽異日之盜賊矣

邵芳曰本地之兵習知地利可爲本地防守而顧戀桑梓不能追勦大敵追勦大敵非客兵不可故練土兵與調客兵亦不可偏廢廣西狼兵出自東蘭那地丹州者能以少擊衆十出而九勝其軍令

極嚴凡一人戰沒左右不夾擊者斬一伍之衆論罪以差退縮者斬走者斬言恐衆者斬敵人衝而亂者斬敵旣敗走佯以金帛遺地爭取而不追攝者斬號令畫一故能成功

浙江處州之梁高山坑兵自幼開坑盜礦驍悍難制而其勇可用周元襄巡撫江南凡父老士庶無不延訪或時在路亦止輿受言始則集衆人之細長終則成一人之大智陽明先生自入仕以至節鉞動隨生徒顧問帷幄後值濠變龍光黃受諸人或爲間諱或潛伺察或通機密皆以平日腹心爲之遂能成功

唐順之曰軍貴以氣勝人將官棲泊海岸日遇海風則頭暈目眩夜聞潮聲則耳聾心惕望其長驅海島掃清大懟能乎督師宜時禦戎服出入軍中發揚蹈厲以作武夫之氣大將遇有賊戰戎服出入陣中以作偏裨小校之氣小校遇有賊戰戎服先登以作士卒之氣又

於臨陣督戰間取潰校逃卒遵奉旗牌事例百萬中忽然斬戮一二人以變士卒之耳目使我之氣日益精明則賊之氣自然銷沮

法宜先行於將官及左右親幸之人若於此稍存姑息則士卒不服矣又罰典宜行於臨陣對敵之時不止行於參提之後則士畏而知威賞格不廢於尋常用兵之日而不止用於大軍征討之日則士習而知恩古者賞不踰時罰不後事過時而賞與無賞同後事而罰與不罰同況過時而不賞後事而不罰何以齊入心而作興士氣乎賞罰之典雖在而操縱失宜進而效死無爵賞之勸退而奔逃無誅戮之及士安肯心死也

方廉日用兵之際衝鋒爲難斬級次之海上賊船初來能迎其鋒犁沉一船飽去之賊犁沉一船均當受上賞如不能對敵搖駕小船撈取首級者不惟不賞合以退縮論又鄉村零斬必要審地方隣証見

賊犯某處從何斬獲取有線方照格行賞查係假冒卽當以妄殺平民論臨陣不可生擒在野不可妄殺又去船殺人劫財已厭其欲殺一賊止是一賊若殺却來賊一人是至了幾個好人性命故論功行賞當以海中擊來船爲奇功

出入波濤冒不測之險人情所甚不堪但地理有險夷而土著者無險人情有利害而利重者忘害沿海諸軍自少至長身履目擊習於波濤若於垂危冒險轉戰窮追亦只同常廩無以作其氣矣今須多給行糧豐其犒賞定格將弁兵民能使賊船不得登岸而於海洋擒斬首級得叙異格比內地所獲賞之加倍若止獲賊船但在洋面亦以大小論級則人皆爭奮而無不堪之情矣

胡世寧曰以首級論功非善法也兩軍相當爭先格鬪者手眼瞬息不得差池使其取首則再不得戰而爲敵所乘後軍所爭奪死矣故

首級非賊大敗遠奔不能割而割之者多或非真也貪軍奮死殺賊止望得賞豈圖陞官故殺賊者不能取首而得首者又爲勢要所奪又或因爭首自相蹂踐而爲敵所敗甚至戮平民傷戰士取首以爲功其弊有不可言者今須於將臨陣時報明願衝鋒者給予衝鋒木牌使衆兵皆知彼雖不前誰則容之衝鋒者不許砍取首級先拏首級來獻杖一百仍不給賞通計一陣斬獲首級若干賞銀若干以七分賞衝鋒兵以二分給予助陣砍取首級之兵以一分驗其在陣被傷者給之庶賞有差等不致爭亂而人皆思奮矣

凌雲翼曰領兵官員不能奮勇運謀爲地方保障往往將被擄逃回或窮鄉避難之民殺以報功至行路者非成羣不敢是不能禦賊而反爲民害至指稱奸細必假妝吾民可以審究且許生擒不許殺害違者一體抵罪又吾民被賊殺而無人收葬正堪矜憫而或割其首

級請功誣非大恨宜於所獻首級驗明果係皮肉緊縮有血瘡刀痕者方爲真正給賞否則立予責打庶愼軍功重民命兩得之矣

唐順之曰烏銃手不能割首級論賞照數分給與諸軍同

茅鹿門曰守險者必先設險於險之外設戰艦備火攻謹斥堠賊未泊岸則當夾水而陣以邀擊之賊旣及岸則當隨賊艘所泊而直搗之此海上格鬪之兵將之最猛兵之最精者可以當之

陳可願曰吾昔使日本見陳錢乃孤山突出極東大洋水深不可下碇又無壘可泊以此爲期會之地不便也馬蹟有小潭可以泊舟但有龍窟不可放砲此山在陳錢之西離大衢尙遠以爲會哨之地可也大衢與長塗相對其西有礁無壘不可泊船亦有龍窟宜避東面之衢東壘可容廣福船四十隻其水震蕩不寧舟泊易壞不如大船藏長塗之北而以哨船泊衢東壘遇警舉號招廣福船擊之但大衢

在北長塗在南相離不過半潮之遙潮從東西行兩山東縛其勢甚疾哨船戰船潮平然後可行策應亦有不便者

胡梅林曰禦海洋者離內地太遠聲援不及接濟不便風潮有順逆碇船有便否蛟龍之驚觸礁之險設伏擊刺之難將官之命危於磊卵無惑其爭執難行也然自禦海洋之法而賊至必知爲備甚易苟因將官之不欲而遂已之是因噎廢食也如愚見哨賊於遠洋而非常厥居擊賊於近洋而勿使近岸是謂善體法之意

蔡汝蘭曰茫茫巨洋極目無際雖於要害之處聯艦設備而疾風怒濤不時亦必擇善地而停泊焉豈能揚帆起碇常出洋口而能盡阻賊船之不出入哉必欲盡收全功以爲經久不易之圖在於水陸夾攻探有賊船潛入海口水兵星羅於外陸兵雲布於內其將至也擊其困憊既至也擊其先登既登也擊其無備以疲憊倉皇之賊而當

我養盛豫備之兵一鼓成擒可不血刃矣

凌雲翼曰哨探者兵之耳目也哨探既真則先事有備今沿海把守官弁賊至皆不聞知及已近岸倉皇失措甚則我船亦被擄而爲賊資能無失事乎宜飭各哨官弁多置蜈蚣筋梭船精選知水性之人遠出外洋分投哨探如有聲息先來傳報附近各港官兵一聞警急隨合鰲約會截擊大洋庶可獲制勝之功

胡梅林曰哨探與間諜不同間諜者使人於敵中設法離其腹心覘其虛實之謂也哨探者將欲進兵預遣人裝作田夫漁樵之類於兵所經行險阨路口宵行夜伏分探我兵將到之前夕某處有伏某處無伏逐路預報兵庶安心前進此惟極其機警熟知道路之人方可任使乃將之腹心所託兵之安危所係也

列地定制犬牙相入所以相衛也封疆相錯所以相保也春秋鄰國

平口車口

不能救則譏之宜嚴鄰援之約賊攻西則東出銳師攻其左賊攻南則北出銳師繞其後賊攻中則左右前後各出銳師四面而起并其守地而兵先至者有異賞坐視其鄰之敗者與同罰則賊腹背受敵安能肆而不顧哉

魏校曰海寇須開其自新之路王守仁曰出給告示凡脅從皆不問雖嘗受賊官能逃歸者皆免死斬賊歸降者給賞使內外居民四路傳播以解散其黨

仇俊卿曰海寇之黨有冤抑難伸憤而流於寇者有貨殖失計困而營於寇者有功名淪落傲而放於寇者有傭賃作息貧而食於寇者有知識風水能而誘於寇者有親屬被拘愛而牽於寇者有搶掠人口其而役於寇者諸如此類不無可矜雖在盜賊之日未必無求生之心可以招徠爲攻心之謀伐交之計揭榜通衢於賊所出入之處

明諭賊黨中有願歸籍者許令不時投首官給口糧分遞本籍傳親鄰保認卽時釋放中有豪傑能以智力取賊首來獻或說誘謀王出降者准奏予官職如此則彼心危疑其黨易散又聞寇至地方必先擄其土著之人以爲嚮導吾卽以鄉人之智巧遺之擄去反行間諜或假作接濟之人與之往來使不相疑或暗賄之財使厚相結兼餽飲食使日相狃如此則彼之情得而可行吾計以取之矣

胡世寧曰盜賊之興卽當撲滅於微若其旣久而多則不得不撫捕兼行蓋以情則脅從勿治以勢則延蔓難根誅也已招者不殺再叛者不招新起者必撲滅於微

王守仁曰招撫之議可偶行於無辜脅從之民不可常行於長惡怙終之寇可以施於回心向化之徒而不可屢施於隨招隨叛之賊吳子孝曰治兵以得民心爲本今海隅之民富者遇剽掠而盡其貲